

Averil Arthur- 27 dé Juillet 2024

Ch'est Jean Treleven tchi vos pâle auve la lettre d'Averil Arthur.

Si dèrniéthement, par eune calme séthée, juste d'avant la tchête dé la niet, ou vos trouvîtes dans eune région d' Jèrri où'est qu' poussent des bruèthes et des feûgiéthes, p't-être qu'ous ouiyêtes lé chant étrange d'un ouaîsé qué j' app'lons 'la huppe'. Malheutheusement, j'avons donné chu nom à deux ouaîsieaux difféthents. Pour êt' cliai, j' né pâle pon d' l'ouaîsé r'mèrquabl'ye - bronze, nièr et bianc atout un long tun sus la néthe tête, tch' arrive ichîn dé temps en temps, mais d' l'ouaîsé pus mystéthieux et discret, lé chein qu' les Angliais appellent 'nightjar'... Chu son rav'nant à un bourdonnement mécanique continnue pour plusieurs minnutes, cliai à plusieurs chentaines dé mètres et r'pété pendant des heuthes. Cèrtains sont d'avis qué l' son est comme eune motorbike du temps pâssé atout un môteur à deux temps, d'autres pensent d'un rouet ou ofûche eune affileuse. N' y' a pon d'soin, chu son n' semblait pon notamment m'nichant, sénon qué j' l'ouiyons dans les ténèbres dé la niet, jé n' séthions pon troublés du tout. Mais bein des criatuthes nocturnes sont considéthées soupçonneusement, comme les cahouains et les cauques-souothis. L' ouaîsé mâle chante sus iun d' ses assias dans san territouaithe. Quand i' s'arrête, i' peut s'envoler et étant tchuthieux i' peut v'nîn dgêper près d' vos. Nou vait raïque sa forme et san vol, grâcieux et agile. Sont-i' l'originne dé not' illusion des fées?

D' la taille d'un pigeon, il a eune tête apliatie, lé profil èrsembl'ye à un amphibien. En êffet, iun des nombreux mênoms donnés à ch't ouaîsé, pus dé trente rein qu'en Angliétèrre, est 'flying toad'. Il a eune dgeule énorme, mais un p'tit bec, et n' peut don absolument pon répondre à san nom scientifique dé Caprimulgus (triyeux dé biches). Chu nom înjuste, duthant l'temps d' l'ancienne Grâce, veint d' chein qu' les huppes attrapent les însectes volants attithés par la caleu des bêtes et don i' 'taient souvent observés près des troupieaux. Ches ouaîsieaux sont présents en Ûrope raïque pendant les mais d'Ëté. Sinon, i' s' trouvent en Afrique sub-Saharienne.

N' y' a pon dé r'cords sus (entouor) les ouaïsieux avec lus p'tits ichîn, mais raïque tchiques témoignages dé ouaïsieux veus duthant là période dé migration. Mais achteu, dépis tchiques années, heutheûsement deux'-trais d' ches rares ouaïsieux sont à pâsser l'Été siez nous et sont à êl'ver lus p'tits.

Bein seux, achteu j'avons des piëssantes longues-veues, mais en temps pâssé un tas d' observâtions d'natuthe 'taient faites en tithant sus des spécimens. Ch'est Arthur Ransome, l'auteur dé "Swallows and Amazons", tchi nos donnit l'expression ' What's hit is history, what's missed is a mystery'

En d'autres tèrmes, un spécimen mort est la preuve qu'i' 'tait là, lé chein tch' êcappit est inconnu.

Les huppes, tchi n' sont actives qué dans la r'vèrdie, pâssent les heuthes du jour dans l'aithe ou lé long d'eune branque dé bouais, quâsi sans mouvement. Lus plieunmage cryptique les rend presqu' invisibl'yes, don hardi difficile à tither. Ch'est en tchi n'y a pon des spécimens empaillis.

Même si les gens né lus ramémouaithent pon d'aver veu ches ouaïsieux ichîn, not' langue témoigne dé lus présence. Dans l' dictionnaithe dé Dr Fraînque, nou trouve "quand nou ouait la huppe ch'est un avèrti"

Comme pour un tas d' criatuthes nocturnes, la crianche s'lon latchelle entendre l'ouaïsé est un porte-malheu est connu dans d' nombreux pays, notabliément en Dgèrnésy.

Pour créer chutte crianche en Jèrri, i' faut aver rencontré ches ouaïsieux pus souvent qu'nou l' suppose.

Dans l'av'nîn, jé trouv'thons probabliément des mênoms affectueux. J' crai qu' lé nom 'crapaud volant', déjà trouvé en France, s'sait bein approprié viyant qu' j'avions déjà eune connexion forte avec les crapauds.

Mèrcie bein dé m'aver écoutée.